

Thursday, March 6, 2025

Time - 2:30pm

CM

Chief Minister Pu Lalduhoma'n Sawhthing dahna hmun kudam hrang hrang leh Collection Centre a khah tawh avangin sawhthing lei an chawlrih a ngai dawn a ti a, an hralth thawh hunah Sawhthing lei chu an chhunzawm leh dawn tih a sawi.

Vawiina Assembly thutkhawma zaghna leh chhanna hunah he thu hi sawiin Chief Minister chuan sawhthing an lak khawm an dahna hmun chu a khah tawh avangin inhralh thawl phawt a ngai a ti a, a tahtawlin an tih dawn avangin kuthnathawktute hmanhmawh lo tura chahin an inhralh thawl hunah leh dahna tur a ruah velah sawhthing an lei chhunzawm dawn tih a sawi.

Pu Lalduhoma chuan sawhthing chu kumin chhunga tharchhuah chu an lei ngei dawn tih sawiin kuthnathawktute thlaphang lo turin a chah a, an lei sa chu hralthna tur an ngaiantuah tih a sawi.

Chief Minister chuan sawhthing chu Reliance Company in kg khatah cheng 80 in an la a ti a, Kolkata-a Reliance Outlet-a zawrh turin sawhthing chauh lo thlai thar dang pawh an lei tih sawiin kumtluanin an duh reng a ti a, Mizoram ah Collection Centre din an duh tih sawiin hralthna tur tha an hmu tih a sawi.

<><><>

AGRICULTURE MINISTER

Agriculture Minister Pu PC Vanlalruata'n chuan tun dinhmunah sawhthing chu Grade-a then tumna a awm rihlo a ti a, chhungkaw khat atangin lei tur zat bithliah a awmlo tih a sawi bawk.

He thu hi vawiina zaghna leh chhanna hunah Congress MLA Pu C. Ngunlianchunga zaghna a chhanna ah sawiin Minister chuan sawhthing leikhawmna atan Sawrkarin Secondary Collection 62 a siam a ti a, Secondary Collection Centre ah auction a ni dawn tih sawiin kg khatah cheng 50 a tlin lohna chu support price hmangin kuthnathawktute hnenah pek a ni dawn tih a sawi.

Agriculture Minister chuan sawhthing lei na atana an inbuatsaihna pakhat chu Secondary Collection Centre-a auction a ni a ti a, kg khatah cheng 50 in a chhangtu an awmloh chuan sawrkarin a laksak dawn a ti a, hei hi Secondary Collection mumal zawka kalpui anih theih nana bultan chhungte, a man sang zawka nawr anih theih beiseina leh an tharchhuah tam that avanga buaina awm venna atana hmalakna ani tih a sawi.

Minister chuan Sawrkarin sawhthing man a tum chin tur chu kuthnathawktute hnenah Direct Beneficiary Transfer hmanga pek tura ruahman a ni a ti a, Secondary Collection Centre chu Society hnuia sumdawnna puitling kalpui thei tura thuam chak a, support price hmanga sawhthing man hniam lutuk tur ven chu sawrkar tum dan a ni a ti a, Market ngelnguet zawk siam theihna tur ani beisei a ni a ti bawk.

<><><>

DRUGS ABUSE PREVENTION

Ruihhlo hman khawlohma laka invendan tur zirhona hun 'Capacity Building Programme on Drugs Abuse Prevention' chu nimin khan I&PR Conference Hall, Lianchhiari Runah hman a ni.

He huna khuallian Minister Pi Lalrinpuii chuan Ruihhlo chu Mizoram leh hnamin a chhiatpui thu leh hmelma lian ber a ni tih sawiin, hemi dona kawnga inzirtirna hun hman chu a pawimawh hle tih a sawi a. Sawrkar ang pawha ruihhlo do chu an thupui ber a nih thu leh, an thawhpui Home hrang hrang leh ruihhlo ngaite enkawlna hmun hrang hrangte chu tun aia tha leh zuala sawrkar thawhopui tura sawmin; ruihhlo do chu kohhran, sawrkar leh tlawnmgai pawl anga tangruala do ngai a ni tih a sawi a. Department-a thawktute inpekna fakawm a tih thu sawiin, kalkhawmte chu Department thawhopui kawngah tan la leh zual theuh turin a ngen nghal bawk a ni.

<><><>

AIR NEWS ON SOCIAL MEDIA

Chanchinhar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinhar hi ngaihthlak leh chhiar theih a dah a ni. Zanin dar 6 leh a chanveah Chanchinhar hi puan leh a ni ang.

<><><>

GOVERNOR

Larsap General (Rtd) Vijay Kumar Singh chuan nimin khan Geospatial World buatsaih 'Indo Pacific GeoIntelligence Forum 2025', a tum 15-na chu Hotel Vivanta, Dwarka, New Delhi-ah a hawng.

Larsap chuan Indo Pacific region chu khawvela sum leh pai than chakna hmun mai bakah ram venhimna kawnga hmun pawimawh tak a nih thu sawiin, Geospatial technology leh GeoIntelligence-te chu hemi ram huamchhunga awmte tana hmanraw tangkai tak a nih thu leh geospatial data-te ruk chhuah a nih loh nana venhim a tul thu a sawi bawk.

Larsap chuan Indo Pacific region chu khawvel pum ang pawha insumdawntawnna hmun pawimawh tak, khawvel mipui zatve aia tam mah chenna leh ram leilung hausa tak a nih thu sawiin, boruak munawm leh ralmuang a awm zel theih nan thiamna sang zawk next-generation GeoIntelligence hmanraw hrang hrang AI, Machine Learning, Spacial computing leh adangte chhawr tangkai a tul thu thu a sawi a. Indo Pacific region-a awmte chu tun hun leh nakin zel thlenga boruak muanawm a awm theih nana ngaihtuahna senga helam hawia hma la tur leh thawkho turin a sawm a ni.

Indo Pacific Geo Intelligence Forum hi venhimna lam kaihhnawih thiamna chi hrang hrang zir tura intawhkhawmna niin, chenna hmun azirte, sik leh sa inhlak avangte emawa buaina awm thei leh changkanna avanga danglamna thlengte zirho thin a ni. Kumin thupui atan 'NextGen Sovereign GeoIntelligence Assets for Regional Security' tih hman niin, naktuk thleng a awh dawn a. Hemi hun chhung hian sawm bik mithiamte'n defence technology kaihhnawih hrang hrangah zirtirna an pe dawn a ni.

<><><>